

西夏書事

序

古之爲史舉其大綱堯舜二典是也其後爲編年以
序事迨司馬遷始創紀表書傳之體漢以下承之是
不必大一統之有史也大事書之策小事書之牘侯
國並著其官孟子曰楚謂之檮杌晉謂之乘魯謂之
春秋其義一也然則有守土設官職立功名而畀子
孫者雖異俗偏隅其世系可考治亂可誌典章名物
之可詳賢否善惡之可勸可戒誠有不容泯者矣拓
跋氏漢西羌之別種而見于載籍則自晉建元元年

爵拓跋猗盧爲代王始北史魏本紀魏之先出自黃
帝軒轅氏黃帝以土德王北俗謂土爲拓謂后爲跋
遂以爲氏隆安間拓跋稱帝歷晉宋齊梁享國日久
迨高洋族魏子姓遂微間有散處於幽朔間者越三
百三十年而拓跋復興豈其苗裔歟或曰黨項部落
南雜春桑北連吐谷渾其間八姓並強而拓跋氏爲
最當唐季分崩五代擾攘之際而拓跋竊據西土思
恭仁福創肇于前德明元昊鴟張于後結好契丹雄
視中土時而摠誠時而構釁開邊通市奮揚其志而

饗養其欲拓地數千里傳世十餘禩雖以藝祖太宗
之英武僅僅示尊寵申盟約幾有宋之世羈縻之而
已職其故寧夏古羗戎地漢曰朔方晉赫連勃勃所
都山有賀蘭之險水有奢延之廣右達嘉峪左抱榆
林自古西戎必爭之地加以元昊梟獍之雄馭桀驁
之衆人爲之用而威在遠夷立國之由雖曰地利人
事有焉跡其建學校設兵防班爵祿備禮樂文修武
舉儼然西陲一大國矣仿之遼金本無多讓而遼金
有史夏無專書間或散見諸編異同難出稽古者不

能無憾也雲間吳子西齋讀書三十年尤究心於史
班之學而又韜才遜志不欲以作家自命特輯西夏
書事一書一遵綱目編年之制自唐僖宗中和元年
迄宋理宗寶慶三年三百四十一年中拓跋氏之世
次昭著行事詳析不蔓不支有條有序予奪嚴而採
擇慎洵乎得古良史之遺意焉惜紀載鮮考蒐羅莫
迫不獲具紀表書傳之體率作者深心多矣雖然先
賢有言曰古史文約而意周近史敘繁而體雜五代
而降辭意兩蔑哀然成書迄無啟發令人展卷思睡

不若存其大凡以昭一國之紀綱風俗不失春秋左氏之意不猶善歟是則西夏書事一書之不可無而足與遼金二史相發明雖並垂不朽也可

賜進士及第 誥授通議大夫山東按察使前翰林院修撰同學弟琢堂石韞玉頓首拜序

序

馬班改編年爲紀傳荀袁又改紀傳爲編年自是而還作者林立古人待作者而傳耶抑作者藉古人而傳耳然而或傳或不傳異焉者何也大抵言人所已言則其傳者常少言人所未言則其傳者常多故載筆者尤貴知所擇焉史部自正史而外僭僞之國類多誤述阮氏七錄立僞史一門嗣是晉書末附載記隋志唐六典改稱霸史如吳越春秋越絕書十六國春秋華陽國志下逮十國記年五國記事江表志南

唐書蜀檮杌三楚新錄吳越備史等書皆與正史相
出入雖瓜分豆剖蜚聲紫色不得比於中朝然其盛
衰興廢之迹治亂得失之故亦未始不足以示鑒戒
資考証也河西李氏自思恭授鉞於中和仁福析珪
於乾化傳至元昊跋扈鴟張僭稱尊號凡十世而降
於蒙古自古偏隅竊據享國傳世固未有若是之歷
年多者考拓跋本党項八部唐書厠諸西域宜也洎
仁福晉封王爵儼然西陲一大國矣乃歐陽氏五代
史仿龍門例撰十世家擯而不與或以是時十國次

第剗夷而西夏方抗衡中國尙未能要其始終且惡其夜郎自大不予以割符世爵故耶然仁福列傳猶進之劉守光李茂貞等藩鎮之列則固未嘗夷之也厥後元人修宋史則竟置西夏於外國曾留從敘陳洪進之不若遂與高麗日本同科遼金二史因之夫豈歐陽氏進退之意哉其專紀夏事者羅氏夏國世次久佚王氏西夏事畧卽東都事畧中之夏國傳乃好事者鈔出別題孫氏夏國樞要已入宋史傳中劉氏西夏須知訖於神宗之世較之正史反不逮遠甚良

由西夏僻處羌夷華風未染文藝詰牒盡易蕃書國
人卽間有紀載亦莫能辨其文義以故典章闕畧簡
策凋殘縱或散見諸書獲存什一於千百而歲遠則
同異難密事積則起訖易疎誰復從千百年後網羅
放失珠聯而繩貫之是可慨已吾友吳子西齋夙負
儁才淹通羣史思有以自表見而無所藉手也於是
取唐以下各正史之記夏事者參以李氏長編諸家
續通鑑續綱目旁及稗官野乘奏議文集苟可掇拾
補綴無不廣爲搜採以供疏證每年必冠以中朝正

朔用昭大一統之義并附遼金紀元俾易稽考至於
褒誅予奪書法畧仿紫陽疑者闕之蓋其慎也書成
名曰西夏書事西齋殆知所擇者歟殆能言人所不
言者歟嗚呼足以傳矣吾邑自

國朝以來潭西楊氏熟精史學所著五代史志疑遼
金綱目已登秘府近日虞尊湯氏南唐書注取法世
期是皆有史學而知所擇者也其並傳也固宜

道光六年歲在丙戌季夏六月

賜進士出身

誥授朝議大夫廣東高州府知府署

高兼道事愚弟趙逢源宗遠甫頓首拜序

叙

昔聖人作春秋爲史家編年之祖逮馬班創立紀傳
古史之法微矣袁陳而降述作紛紛有正史有別史
有雜史別史雜史所以詳正史之畧也予友西齋吳
君精於史學正史別史靡不討尋所著西夏書事一
書蓋補雜史畧也西夏綿延五代終始遼金顧遼金
有史夏鮮成書志古者憾焉西齋撫河西陳跡搜拓
跋遺文事之不可沒者書之事之不容諱者書之內
事必書外事間書之盛衰理亂功罪或大書或特書

月緯年經具有體例余受而讀之竊嘆是書之成其難有三焉元拓克拓修宋遼金史舊有實錄可據不過仍其文而稍爲編次西夏典籍云亡其攻伐禮樂兵刑諸大務僅散見於宋遼諸史及王偁東都事畧李燾通鑑長編於此而鈎索攷稽以成一國紀載難矣哉卽劉溫潤西夏須知孫奭夏國樞要編殘簡斷紕繆紛紜理亂絲而入扣殊費經營於以知西齋之用心勤矣古人著述莫先聚書梁沈約任昉輩並號良史才其藏書各有數萬卷宋司馬光作通鑑所採

書自正史外至三百三十有二種西夏蕃書紀事文
義罕明故歷朝一統志陝甘新舊通志綏靈寧夏各
州衛志職方失考文獻少徵而儒生力綿購貯家鮮
秘藏第籍耳目過閱以爲證援難乎不難乎於以知
西齋之見聞博矣且陸翽著鄴中記徐鉉撰江南錄
鄭文寶增修江表志以及周羽翀之三楚新錄句延
慶之錦里耆舊傳之數人者非生長其國卽身立其
朝而或失之誣或失之畧猶未免見嗤君子矧西夏
僻處西陲去今五百餘載地偏則見聞失實世遠則

攷據無從乃網羅散佚貫立條流正其舛訛抒以論
斷使二十一主三百四十餘年之事迹釐然不紊作
者固不知其難讀者亦忘其爲難於以知西齋之才
識貧乎不可及已西齋知予有同好每一過從輒以
史學相規摹悉其撰述尙有廿二史金石攷異明史
紀事本末補歷朝名年紀畧明遺雜記諸稿則予之
序是編也亦祇嚆矢之鳴而已道光六年歲次丙戌
仲春中浣弟周郁濱泉南氏拜撰

西夏書事目錄

第一卷

起唐僖宗中和元年盡梁末帝龍德二年

第二卷

起後唐莊宗同光二年盡周恭帝顯德六年

第三卷

起宋太祖建隆元年盡宋太宗太平興國八年

第四卷

起宋太宗雍熙元年盡淳化元年

第五卷

起宋太宗淳化二年盡至道元年

第六卷

起宋太宗至道二年盡宋真宗咸平三年

第七卷

起宋真宗咸平四年盡六年

第八卷

起宋真宗景德元年盡三年

第九卷

起宋真宗景德四年盡大中祥符七年

第十卷

起宋真宗大中祥符八年盡宋仁宗天聖五年

第十一卷

起宋仁宗天聖六年盡景祐元年

第十二卷

起宋仁宗景祐二年盡寶元元年

第十三卷

起宋仁宗寶元二年盡是年

第十四卷

起宋仁宗康定元年盡慶厯元年正月

第十五卷

起宋仁宗慶厯元年二月盡二年六月

第十六卷

起宋仁宗慶厯二年七月盡三年六月

第十七卷

起宋仁宗慶厯三年七月盡四年

第十八卷

起宋仁宗慶厯五年盡八年

第十九卷

起宋仁宗皇祐元年盡嘉祐二年

第二十卷

起宋仁宗嘉祐三年盡八年

第二十一卷

起宋英宗治平元年盡四年

第二十二卷

起宋神宗熙寧元年盡三年

第二十三卷

起宋神宗熙寧四年盡五年

第二十四卷

起宋神宗熙寧六年盡元豐三年

第二十五卷

起宋神宗元豐四年盡是年

第二十六卷

起宋神宗元豐五年盡六年

第二十七卷

起宋神宗元豐七年盡宋哲宗元祐元年

第二十八卷

起宋哲宗元祐二年盡五年

第二十九卷

起宋哲宗元祐六年盡紹聖二年

第三十卷

起宋哲宗紹聖三年盡元符元年

第三十一卷

起宋哲宗元符二年盡宋徽宗崇寧二年

第三十二卷

起宋徽宗崇寧三年盡政和五年

第三十三卷

起宋徽宗政和六年盡宣和七年

第三十四卷

起宋欽宗靖康元年盡宋高宗紹興五年

第三十五卷

起宋高宗紹興六年盡十四年

第三十六卷

起宋高宗紹興十五年盡三十二年

第三十七卷

起宋孝宗隆興元年盡乾道七年

第三十八卷

起宋孝宗乾道八年盡宋光宗紹熙五年

第三十九卷

起宋寧宗慶元元年盡嘉定元年

第四十卷

起宋寧宗嘉定二年盡十年

第四十一卷

起宋寧宗嘉定十一年盡十六年

第四十二卷

起宋寧宗嘉定十七年盡宋理宗紹定五年

雲間劉貢九鐫

西夏書事凡例

一霸國有史晉唐以來述作紛紛載籍極博宋有天
下幾三百年西夏遼金並雄西北而遼金有史夏
鮮專書緣其地連沙磧人半羌夷元昊自造蕃書
以紀國事國亡之後文義莫辨遂至掌故失傳宋
遼金三史有附傳而弗詳廣成諺輯是編雖無當
于參稽或亦可以備殘缺焉

一梁蕭氏方等

三十國春秋魏崔氏

鴻

十六國春秋

宋劉氏

恕

十國紀年等書皆分紀列傳體擬正史

西夏事散見諸史者不過朝貢攻伐數大端卽歷朝一統志陝甘新舊通志綏靈寧夏各州衛志自拓跋啟疆職方失考終夏之世絕少人文蒐羅不易紀傳爲難惟于立國之始終傳祚之世數以及夫朝政之理亂主德之昏明皆約而可稽爰爲件繫條分綱舉目附名之曰書事

一繼遷立國元昊稱尊開國承家幾與有宋相終始而西夏之稱亦始于宋則書西夏當以宋爲斷然溯契丹者大基習宇志女真者盛始胡來夏自思

恭秉節夏綏綿延五代爵晉西平擬之當時荆南
吳越諸國無多讓也首卷追述中和蓋亦討本尋
源之意

一朱子作綱目凡正統未一天下概不大書年號明

屠氏

喬孫

項氏

琳

所訂十六國春秋悉將晉宋正

統繫年蓋尊中國大一統理固然也李氏系出羌
戎稱臣唐宋故自始迄終悉以中國冠元至元昊
僭號始書改元某年備列年數于後

一綱目正統繫年之下分注僭國某年所以別正僞

紀興亡也西夏自繼遷請婚遼國乾順受地金源
玉帛干戈紛紜錯襍若不節注二國紀年事難稽
考然俟互有開涉方行附入旣便查核亦免支離
一元托克托纂修三史惟金史列傳年月稍詳餘則
叙事混濛詮次頗難是編分年析月悉遵三史帝
紀夏國附傳或遵王氏傳東都事畧李氏燕通鑑
長編及薛氏應旂宋元通鑑商氏格宋元續綱目
王氏宗沐徐氏乾學畢氏沅通鑑後編續通鑑諸
書其餘稗官紀載時日不同亦必前後不相矛盾

方始甄錄

一以宋遼金書借叙夏事最易喧客奪主篇中綱主
西夏目則參引諸史間有刪節乃以嚴主客之辨
非敢蹈割裂之愆

一古史體例一代之主必著論贊西夏統系絕續者
三自思恭至彝昌而一絕自仁福至繼捧而再絕
因其尙未成君僅附總論若繼遷建都西平傳德
明而封夏王至元昊而稱國主自可卽其行事迹
其生平偶附小論餘皆仿此

一史以傳信亦以傳疑是編于宋遼金事稍涉西夏
靡不收羅然有時地不詳及原委莫竟者則于分
條之後或按時或因事另立附例概不混書以示
疑也

一史各有志如天文地理職官選舉禮樂兵刑別類
分門務取該備而霸史則祇見紀傳中以彰一朝
治亂西夏典策云亡其文志不少概見因就管窺
所及畧志數條姑存梗概簡漏之譏知所不免

一王氏

傳

西夏事畧劉氏

溫潤

西夏須知孫氏

吳宋史藝

文志作
蘇氏

夏國樞要及夏臺事迹諸書言人人殊較
之正史不無舛錯至于前賢章奏郡國圖經以及
家乘誌銘叢談野說見有不同詞多相反竊附己
意訂正之然必詳溯根原藉徵確據非敢憑空臆
斷焉

一史文浩博鑑體謹嚴編輯諸家無不去複刪繁期
于簡核夏事如爭城爭地文畧相同賀節賀正辭
多不載然亦正書附列採綴靡遺非故貪多務得
漫失翦裁良因補罅訂亡無敢疏畧

一古來撰述班固衍司馬氏之文延壽節南北史之
要已足自名一家其有專事網羅不資藍本則亦
文獻具在任吾取攜西夏去今歲餘五百舊籍流
傳率皆零繭焚絲不入機杼焉成經緯書中所錄
根尋散佚參合異同雖然菅蒯並收竊幸條流粗
貫後有作者請以爲盤盂之助

宋元諸儒喜于論史雖不能于聖賢作述深心脗
合無間然其講明切究亦能抉奧探微是編文冗
事穢未免顯晦相參竊于是非邪正之致興亡得

失之由間綴數言以免牴牾倘博雅糾其繆而

賜正之則幸甚

一龍門作史記班氏謂一人之精文重思煩其書多

不齊一矧

廣成

拘墟譏陋愧乏三長賴諸同志參

考互訂數載于茲今幸觀厥成謹登諸君姓氏以
見他山之助裨益良多

西夏書事卷一

青浦 吳廣成 西齋集跋

唐僖宗中和元年春三月宥州刺史拓跋思恭起兵

討賊

拓跋思恭

金史夏國傳夏臣羅世昌諸敘夏國世次稱元魏衰微其居松州者復姓為拓

跋本党項羌

隋書党項傳西羌別種其國在禹貢析支之地東至松州西接葉護南界

春桑北鄰吐渾地方三千餘里新唐書党項有八部以姓別為部落而拓跋氏最強始祖赤

辭初臣吐谷渾可汗慕容伏允待之厚與結婚姻

太宗時諸羌歸順拓跋氏不至貞觀八年行軍大

總管李靖奉詔擊吐谷渾赤辭屯狼道峽抗王師
廓州刺史久且洛生遣使諭以禍福辭曰渾主以
腹心待我不知其他若速去無污吾刀洛生怒引
輕騎破之肅遠山斬首數百級擄雜畜六千太宗
因其敗令岷州都督李道彥招之赤辭從子思頭
潛納欵其下拓跋細豆亦以所部請降赤辭知宗
族攜沮稍欲自歸岷州大都督劉師立復誘之乃
與思頭俱內屬分其地爲懿嗟麟可三十二州以
松州爲都督府擢赤辭西戎州都督賜姓李遂職

貢不絕開元中吐蕃浸盛拓跋畏逼請內徙元宗
詔慶州置靜邊等州處之以赤辭孫守寂爲右監
門都督封西平公天寶之亂守寂有戰功擢容州
刺史領天柱軍使廣德二年河北副元帥僕固懷
恩叛誘党項渾奴刺入寇朔方節度郭子儀以党
項吐谷渾部落散處鹽慶諸州恐其滋亂表徙靜
邊州及夏州樂容等六府党項于銀州之北夏州
之東

明一統志謂夏州卽今寧夏衛諸書俱沿其
舊考杜氏通典及李氏元和郡國志夏州東
至銀州一百八十里東南至延州四百里又續通
典綏州東北至夏州二百六十里以地界按之當

西夏書事

卷一

二

在今榆林府界內

復徙寧朔州吐谷渾駐夏西以離沮之

于是召大首領左羽林大將軍拓跋朝光拓跋乞

梅等五刺史入朝代宗厚賚之使還綏其部自後

乞梅居慶州號東山部朝光居銀夏號平夏部

宋琪

奏疏党項是前漢呼韓邪所處河南地幅頓千里從銀夏泊青白兩池地惟沙磧俗謂平夏是也

貞元中有夏州刺史拓跋乾暉銀州刺史拓跋乾

曜拓跋澄等俱官其地思恭乾暉裔孫也

司馬氏通鑑考

異曰歐陽氏新五代史作拓跋思敬意謂薛氏舊五代史避國諱耳後唐書實錄皆作思恭又實錄天復二年九月武定軍節度使李思敬以城降王建思敬本姓拓跋鄜延節度思恭保大節度思孝

弟也思孝致仕以思敬爲保大留後升節度又徙武定軍新唐書党項傳思恭爲定難節度卒弟思諫代之思孝爲保大節度以老荐弟思敬爲留後俄爲節度思恭思敬乃是兩人歐史合爲一人誤

據有宥州

太平寰宇記開元二十六年以六胡州殘人于夏州西南長澤縣地置宥州處

之寶應後廢元和九年于經畧軍復置宥州屬夏綏銀節度以護党項距故州北三百五十里稱

刺史

歐陽新史作夏州偏將冊府元龜作夏州將

時冤句盜黃巢由潼

關陷長安僖宗幸蜀關中大亂思恭糾合夷夏兵

數萬約渭北鄜延節度李孝昌會于鄜州誓討

賊剋日入援

按

禮莫重于君臣事莫大于征討有唐中葉太

阿廢銳藩鎮連兵龐勛裴甫之徒乘機肆亂殫
財動衆禍難始平迨乾符以後賊陷兩京宰衡
稱疾乘輿播遷一時行間將帥非畏賊托風濤
之阻卽縱寇畱富貴之資雖有義成入援鳳翔
傳檄而有倡寡和寇患益深思恭党項小羌位
卑力弱獨能會合鄰道舉義勤王較之代北朱
耶雲州赫連奉詔興師者不加一等乎書起兵
著其能爲西州之倡書討賊嘉其克盡人臣之
誼也

夏四月權知夏綏銀節度事

長安陷夏綏銀節度諸葛爽屯軍櫟陽巢將朱溫
誘之爽降賊僖宗遂以思恭爲左武衛將軍權知
夏綏銀畱後 胡三省曰此拓跋氏強盛遂爲跨
據西夏張本

進兵武功

思恭兵進武功與鳳翔鄭畋義存王處存涇原程
宗楚河中王重榮四節度盟圖復長安

戰于王橋不利

諸軍進薄長安黃巢東走市民爭出迎程宗楚恐
諸將分功獨夜入城肆掠賊謂知官軍不整且諸
鎮不相繼引兵還襲之宗楚死巢復入長安詰旦
思恭與李孝昌來援與賊遇于王橋戰不利死傷
甚衆

秋七月進軍東渭橋

思恭聞忠武節度周岌昭義節度高潯連復鄧華
諸州復與李孝昌引軍進屯東渭橋守水北壘以
逼長安賊遣僞中書令尙讓東面行營都虞候朱

溫帥二萬騎拒之

按

上書不利茲書進軍嘉思恭志在滅賊不因
敗而稍挫也

八月授夏綏銀節度使九月與賊將尙讓朱溫戰弟
思忠死之

朱溫尙讓率衆涉渭思恭遣弟思忠迎擊戰于東
渭橋橋表有鐵鶴思忠射之沒羽賊駭走思忠逐
北深入殁于陣僖宗贈宥州刺史立祠渭陽

按

書死之予節也思忠爲繼遷遠祖史不具官

諒非顯秩然當賊勢鴟張千里勤王一死報國
非忠勇性成者不能宜其廟食一方祚傳二百
餘年之久也

冬十一月戰于富平不勝奔夏州

諸鎮勤王皆以師老還延勿進賊將知右軍事孟
楷襲思恭軍于富平思恭力不支領殘衆奔歸本
道

按春秋私逃書奔奔者匹夫之行思恭兵敗不
奉王命擅回本道書以貶之

十二月夏州賜號定難軍

思恭既回夏州繕甲訓兵表請討賊僖宗嘉之賜其軍號定難促兵入衛

中和二年春正月定難軍節度使拓跋思恭授京城南面都統夏四月進軍屯渭橋

宰相王鐸見諸道無心討賊發憤請行僖宗命鐸兼中書令充諸道行營都都統令夏綏鄜延諸軍會之授思恭京城南面收復都統檢校司空同中書門下平章事思恭復出兵屯渭橋受鐸節制

按上書不名此復名重歲首也後仿此

秋八月授京城四面都統

思恭以銳士八千頻與賊戰僖宗進爲京城四面收復都統權知京兆尹事

中和三年夏四月定難軍節度使拓跋思恭從雁門節度使李克用復長安

思恭奉詔從克用討賊連敗賊將尙讓黃揆兵進軍渭南與克用將楊守宗河中將白志遷等擊賊一日三捷賊衆奔潰諸軍自光泰門入京城黃巢

焚官闕遁

秋七月晉爵夏國公

僖宗以思恭討賊功

歐陽新史云朱玫之亂思恭與鄜州李思孝以兵屯渭橋

其後黃巢陷京師與王重榮李克用等同破賊有大功考新唐書玫亂在僖宗光啟二年後黃巢亂五年鄜夏兵不至新史誤加太子太傅爵夏國公

按此夏國得號之始

復賜李姓

自後歷世仍之

按賜姓始于漢婁敬至唐而盛綱目書之不勝

書必甚美甚惡乃書思恭之功雖不及克用然較全忠茂貞輩不啻天淵矣書以美之

光啟元年秋九月定難軍節度使李思恭合邠寧軍討河中

河中節度王重榮據鹽鐵之利中尉田令孜惡之建請領屬以佐軍食重榮不可據河中叛令孜使邠寧節度朱玫與思恭合鄜夏軍三萬討之

十二月戰于沙苑敗績

諸軍分壁沙苑王重榮計誘河東李克用合兵拒

戰攻不勝鄜夏兵俱敗

光啟二年冬十一月定難軍節度使李思恭奉詔討
襄王煊次于綏州

朱玫恥爲中人用與重榮克用連和上表請誅令
玫大掠而西僖宗幸鳳翔避之玫與同平章事蕭
遘等奉嗣襄王煊權監軍國事據長安旋立爲帝
改元建眞僖宗詔山南諸鎮及夏州兵討之思恭
發兵次綏州觀望不出境已聞煊敗遂還

按春秋伐而書次其次爲善救而書次其次爲

西夏事 卷一
貶是時李煜據長安田令孜劫帝如寶雞諸道
貢賦不至從官衛士皆乏食勢不已孔迥乎思
恭顧觀望不前無復以國事爲急書奉詔以嚴
其赴救之責書所次以著其怠緩之罪

文德元年李思恭取鄜延以弟思考知留後

中和中改鄜延節度爲保大軍以東方逵領節度
使逵病去思恭遣弟行軍司馬思考襲取之自稱
留後思恭爲請于朝授鄜坊丹瞿等州觀察使並
檢校司徒同中書門下平章事

按有唐末造藩鎮兼吞始于韓簡之攻河陽繼于秦宗權之陷鄭州極于朱全忠之并臨淄徐鄆禍結兵連至唐亡不解思恭之取鄜延所謂鄭伯效尤也宜後日克用表中以爲口實乎去官貶之也

唐昭宗大順元年夏六月定難軍節度使李思恭偕保大軍節度使李思孝出兵會都招討使張濬于晉州

河東李克用攻防禦使赫連鐸于雲州宣武節度

朱全忠盧龍節度李匡威奏討之宰相張濬請任
其事昭宗令將京軍數萬及邠寧雜虜三萬人抵
晉州思恭與思孝率鄜夏兵會之

冬十月棄張濬軍先歸

官軍出陰地關李克用遣養子李存孝營于趙城
擊敗鎮國節度韓建兵乘勝抵晉州西門張濬出
戰又敗入城拒守思恭與保大靜難鳳翔諸軍先
渡河歸

按晉州之役議者咸咎張濬小人淺謀誤國然

將帥與其事者不當以是非論也思恭既奉命興師則敵王之愾惟力是視乃見敗不救棄帥先歸直書之其罪自見

乾寧二年定難軍節度使李思恭卒弟思諫嗣

思恭子仁祐早卒孫彝昌幼軍中立其弟思諫嗣爲節度使

按此李氏世襲節度之始

秋七月保大節度使李思孝擒邠寧將王令陶于黎園寨

邠寧節度王行瑜求尚書令不得與鳳翔節度李
茂貞舉兵犯闕遣將王令陶據黎園寨思孝與河
東將李存信攻揜之獻于行在舊唐書八月己丑
李克用自至渭橋
若癸巳于黎園殺邠寧軍數千獲大將王令陶以
獻又詔鄜州節度李思孝以本軍進討似屬兩事
而薛氏舊史存信傳則合
爲一司馬氏通鑑從之

八月思諫思孝充邠寧東北二面招討使

李茂貞聞河東兵至斬假子李繼鵬上表請罪王
行瑜拒守如故昭宗命思諫等爲招討使從邠寧
四面行營都招討李克用討之

乾寧三年春三月保大節度使李思孝致仕表弟思敬自代

昭宗詔思孝以太師致仕思敬爲保大軍兵馬留後旋授節度使後徙武定軍附李茂貞天復二年西川王建攻之思敬舉洋州降

乾寧四年春正月定難軍節度使李思諫兼寧塞軍節度使

中和二年以延州置保塞軍

司馬氏通鑑作三年此從唐書方鎮表

已更號寧塞

此據司馬氏通鑑考新唐書方鎮表光化元年更延州保塞軍節度爲寧

塞軍節度是乾寧四年鎮名未改也不知通鑑何據是時李茂貞據延洋秦隴諸州朝廷命思諫兼寧塞節度以分其勢茂貞不奉詔

附

司馬氏通鑑乾寧四年夏四月加定難軍節度使李承慶同平章事而新舊唐書党項傳思諫一生未嘗離定難何以節度忽易承慶此或坊本有誤故從附書

秋九月奉詔討李茂貞授鳳翔行營四面副都統當時興元邠寧鄜坊河中同華諸鎮之兵並起交

爭惟夏州不爲唐患朝廷寵錫優異時鳳翔李茂
貞復以兵逼京畿神策諸軍不能禦昭宗奔華州
詔加思諫副都統命帥師與鳳翔四面行營都統
孫偓會諸道軍討之茂貞尋上表請罪願得自新
師不出

唐昭宣帝天祐三年秋九月邠州李繼徽將六鎮兵
攻夏州冬十月李思諫告急于梁梁遣劉知俊等擊
走之

先是朱全忠攻邠州降靜難節度李繼徽繼徽茂

貞假子也全忠令鎮邠州質其妻子于河中已而私其妻繼徽怒遣使與茂貞連兵茂貞令率鳳翔靜難彰義秦隴等六鎮兵圍夏州思諫告急于全忠全忠使匡國節度劉知俊出兵援之繼徽以五萬衆陣于美原知俊擊破之乘勝取鄜州等地自是夏州服于梁

按此李氏變節之始去官貶之也自是終梁之世皆不具官

梁太祖開平元年夏五月李思諫加檢校太尉兼侍

中

梁受唐禪遣使宣諭州鎮封兩浙錢鏐爲吳越國
王如思諫等皆進秩

開平二年冬十一月李思諫卒思恭孫彝昌嗣

軍中遵思諫遺命共立思恭孫彝昌爲畱後

薛氏舊史

及王氏東都事畧以彝昌爲思諫子而尋起復正
宋史夏國傳云思諫卒思恭孫彝昌嗣

授旄鉞

開平三年春二月夏州將高宗益弑其節度使李彝

昌

宗益官夏州都指揮與其黨謀據夏州遂作亂執
彝昌殺之

按前書李氏不具官茲書節度使何正高宗益
之罪也夫彝昌爲思恭孫不能繩其祖武屈首
朱梁固不爲無罪然以宗益戕之則下犯上矣
續綱目書殺此書弑揆之尊卑上下之義或倍
謹嚴云

三月夏州人誅高宗益迎蕃部指揮使李仁福爲留
後

夏州將吏誅高宗益并其黨相率迎仁福于戍所
立爲畱後仁福以閩梁祖授檢校司空定難軍節
度仁福彝昌族父也歐陽新史及王氏東都事畧
疎也宋史夏國傳彝昌遇害將士立其族子蕃部
指揮使仁福司馬氏通鑑考異云仁福諸子皆連
彝字則于彝昌必父
行也當以通鑑爲正

按當時朝廷衰亂方鎮專恣非以部民逐主帥
卽以偏裨領軍務上下恬然毫不知怪夏州將
吏獨能誅討逆賊迎立故宗其忠義之氣有非
他州可及者書以嘉之

論曰思恭際拓跋中衰平夏勢弱而以區區一州之衆事十八葉天子于危亡之際振數十世遺緒于頽廢之頃蓋不特著忠于國抑且垂裕于家也雖其取鄜延棄張濬事多可議顧當邠寧犯順岐汴劫遷方鎮爭衡中原板蕩獨不聞夏州一騎渡河其保境息民循分效順爲何如耶思諫嗣職庸庸自保視椒蘭之弑而不知援見汴梁之篡而不之討畧公義重私恩以視思恭殆有愧焉然當授受之際承兄繼姪爲宋太

宗元仁宗所不能爲亦可謂善全同氣者矣
彝昌立甫逾年身無失德禍及閭門以思恭亮節
再傳而嫡嗣云亡殊可慨已

開平四年秋七月晉師岐師圍夏州李仁福城守不
下

梁忠武節度劉知俊功名寢盛見梁祖性日猜忍
內不自安潛以同州附于岐王李茂貞後兵敗奔
岐茂貞無地處之使將兵取靈夏知俊攻靈州兩
月不克于是茂貞與邠寧節度李繼徽涇原節度

李繼鸞遣使太原請會兵攻夏州晉王李存勗令

振武節度周德威于是月

劉邠五代春秋八月晉人秦人侵夏州與五代

史通鑑異

合五萬衆自麟府渡河初梁祖遣供奉官張

漢玫國禮使杜廷隱諭賜夏州抵石堡寨聞晉岐
軍至廷隱以防卒三百人星馳入城旣而圍合仁
福兵力俱乏偕廷隱漢玫與指揮使張和李君用
率州民及防卒分陣拒晝夜不少懈

按

拓跋與朱耶滅黃巢賜國姓同功一體人也

晉王志在滅梁仁福若舉四州之衆與之共扶

王室則揚劉夾寨諸戰仁福身在行間存最何
敢專爲己功從此共求李氏立之何後唐之有
哉乃授甲登陴誓爲賊守其有愧于沙陀之賜
姓多矣

冬十一月鄜延援師至圍解

仁福固守逾月遣使告急于梁梁祖遣夾馬指揮
使李遇劉綰率鄜延師直趨銀夏邀其歸路大破
之薛氏舊史後唐紀是役也劉知俊爲岐人所構乃自退與梁紀異且梁紀在十一月唐紀在九月茲從
梁紀 晉岐軍皆解去

十二月加檢校太保同平章事

梁祖嘉其却晉岐師也

附

薛氏舊史梁紀乾化元年夏四月己卯詔曰
邠岐未滅關隴多虞宜擇親賢總統戎任應關
西同雍鄜延華夏等六道兵馬並委冀王收掌
指揮是時夏州奉詔出兵與否攷新舊兩史並
不載

乾化二年春正月李仁福加檢校太尉

並益食戶實封

梁末帝乾化三年春三月李仁福加檢校太師兼中書令封隴西郡王

按

此李氏封王之始新舊五代史乾化二年封高季昌渤海郡王是荆南受封先夏州一載耳後世史家顧以高氏備十國置李氏不與何也龍德二年春二月李仁福入獻

晉兵圍德勝末帝徵諸道軍赴援仁福聞之貢馬五百匹助戰

西夏書事卷一終